

# Co dumognan las scolas la lavina electronica?

Reglas pertutgant handys ed MP3-players

DA CLAUDIA CADRUVI / ANR

■ **Bunamain mintga giuvenil posseda oz in handy ch'el prenda cun sai a scola. Co dattan ils magisters dumogn a quest svilup – era cun tut ils auters apparatins electronics.** Ina retschertga a Zernez, Savognin e Glion: Il svilup cun telefonins na pon ins betg franar, di *Re-to Lehner*, manader da scola a Zernez. Avant diesch onns n'aveva anc nagin in handy ed oz haja prest mintga scolar da la tschintgavla in apparatin. Perquai discurra Lehner d'ina lavina electronica.

Dapi dus onns valia en l'entira scola da Zernez la medema regla. En scola e durant l'instrucziun ston il telefonin u auters apparats esser stidads ed or dals egl, vul dir: En il satgados u en il spint.

## Zernez – in'emna senza handy

Durant pausa na saja quai betg scumandà da duvrar il telefonin. Ma damai ch'il handy saja tuttina stidà durant l'instrucziun na vegnian blers scolars gnanca sin l'idea da prender nanavant el. I fess memia cumplitgà da scumandar il handy durant pausa e da controllar radund 140 scolars, di Lehner.

Cun la regla d'avant dus onns ha Zernez era introduci las medemas sancziuns en tuttas classas. Sch'in telefonin sclingia e disturba l'instrucziun, vegn l'apparat confiscà per in'emna. «Per in scolar è quai in grond chasti, sch'el sto dar giu il telefonin», di Lehner. L'entschatta haja quai anc dà discussiuns e singuls geniturs hajan reclamà. Ma oz saja la chaussa clea ed ins sa tegnia londervi.

## Savognin – tolerà durant pausa

«Nus n'avain actualmain nagin scumond general», di *Jörg Bühler*, manader da la scola circuitala Surses. Ils scolars dastgian prender il telefonin cun sai. «Ma en chasa da scola sto il handy esser tschentà giu, uschia ch'ins na po betg duvrar el.»

Scolars da l'entira Val visitian la scola a Savognin. I dettia situaziuns ch'in giuvenil stoppia telefonar a chasa, per exempel pervi d'in termin da medi. Perquai tolereschia la scola, sch'in scolar dovria durant pausa il handy.

La tematica saja vegnida discussada ed ils scolasts observian tge ch'els scolars fettschian da pausa, di Bühler. Fin uss na saja mai capità insatge, ch'ins avess stui prender en mira in scumond rigurus. Per il MP3-player valia il medem sco per il telefonin. «En chasa da scola na dastgan ils scolars betg avair si quests apparats.»

## Rueun – er betg en il satg-chautscha

«Durant il temp da scola, sin il plaz da



Avair en il satg-chautscha il telefonin è scumandà a Rueun. L'empruvament da duvrar dabot l'apparat è memia grond.

FOTOS C. CADRUVI

pausa ed entaifer il stabiliment èsi scumandà da duvrar in MP3-player ed in handy», di *Gieri Tschuor*, manader dal stgalim superiur da Glion e Rueun. A Rueun hajan ins anc precisà la regla. Ils scolars na dastgian betg avair il telefonin en satg-chautscha, mabain stoppian d'ustar el ch'el na saja betg pli vesibel. Sch'els scolars hajan mo en satg il handy saja l'empruvament da duvrar el memia grond.

Ils scolasts a Rueun hajan prendi questa decisiun per far cler als scolars: I dat spazis da viver, nua ch'ins metta d'ina vart il handy. Uschia tschentian ins in punct che muntia: «Uss n'èsi betg pli temp liber, mabain temp da scola.»

La raschun principala per il scumond saja il disturbi entras quests apparats electronics, di Tschuor. Las scolas sappian plinavant tge che marschia ozendi puncto cyber-mobbing. Ins veglia evitar che scolars vegnian fotografads durant il temp da scola e che talas fotografias vegnian manipualdas u malduvradas.

## Turitg scumonda MP3-players e Cuira ha la regla d'armas

Turitg enconuscha il scumond da handys gia dapi il 1999. Il proxim onn da scola èn er ils MP3-players scumandads. Cuira regla il problem cun ils apparatins electronics en l'urden disciplinar sut il chavazzin «Waffen und andere Gegenstände».

«Nossa regla è fitg simpla», explitgescha *Gion Caviezel*, directur da scola a Cuira. «Tut las chaussas che disturban l'instrucziun po il scolast prender davent.» Quai saja prescrit dapi il 2007 en la «Disziplinarordnung für die Schülerinnen und Schüler der Stadtschule Chur». En quest urden datti l'artitgel sis che scumonda armas u atrappas d'armas sin l'areal e durant occurrenz da scola.

«La direziun da scola po schlargiar quest scumond sin auters objects che disturban il manaschi da scola. Ils sco-

lasts pon adina far controllas, prender davent e confiscar tals objects», stat scrit en l'urden disciplinar. Ils scolars dastgian sa chapescha prender cun sai il telefonin, di Caviezel. Decisiv saja sulet sche l'apparat disturba l'instrucziun. Dapi il 2007 n'hajan ins gè nagins problems da praticar il scumond da telefonins ed apparats da musica.

### L'apparat na dastga betg esser vesibel

A Turitg exista dapi il 1999 in scumond da handys. L'emna passada ha la scola da la citad fatg enconuscent ch'il scumond vegnia schlargià sin ils MP3-players e sumegliants apparatins. La nova generaziun d'apparats da musica na possian ins strusch pli distinguer da telefons, explitgescha *Marc Caprez*, pledader da l'uffizi da scola e sport. I sa

tractia savens d'apparatins da multimedia cun ils quals ins possia filmar, fotografar, telefonar ed ir en l'internet. «Nus lain ch'els uffants baterlan ensemble, fan termagls e curran enturn durant pausa.» Ils apparatins impedeschian per part ils contacts socials. En singuls cas hajan films sin handys da scolars glorifitgà la violenza u mussà pornografia. Era per quest motiv vala a Turitg: Ils telefonins ed apparatins ston esser tschentads giu sin l'areal da scola e na dastgan betg esser vesibels.

Sch'in scolar dovra tuttina il telefonin durant pausa u durant l'instrucziun po il scolast confiscar l'apparat per in di. Sch'in scolar vegn traplà pliras giadas salva la scola il handy enfin ch'els geniturs cumparan per in discurs, explitgescha Caprez la pratica da sancziun en las scolas da Turitg.